

卷百四十四

復

州隨唐縣  
景陵城

棗陽  
沔陽

鄧

州長壽

京山

卷百四十五

襄

州襄陽  
宜城

鄧城  
南漳

穀城

中廬

卷百四十六

先化  
荆門

州軍乾德  
江陵  
建寧  
長林

枝江  
潛江  
當陽

公安  
沙市

松滋  
監利

石首

卷百四十七

峽

州夷陵

宜都

長陽

遠安

卷百四十八

軍安

州奉節  
秋昌  
歸山

巫山

大寧監

卷百四十九

萬

州南浦  
武寧

忠

州臨江  
南賓

豐都  
桂溪

墊江

梁山軍  
梁山



太平寰宇記卷之一百四十四

山南東道三



隨州

郢州

復州

隨州

隨州

漢東郡今理隨縣

禹貢荆及衡陽惟荊州虞舜及周皆

為荆豫之域在周為隨國世本曰隨姬姓也春秋

傳曰楚武王侵隨鬬伯比言于楚子曰漢東之國

隨為大隨國今義陽縣是也其後為楚所滅戰國

其地屬楚秦併天下為南陽郡地漢初立為隨縣

屬南陽郡後漢如之晉屬義陽郡後分置隨郡宋



齊因之西魏置并州尋廢大統十六年克定隨安陸二郡改隨郡爲隨州隋初如之大業初廢州以其地分置漢東春陵二郡唐武德三年復并爲隨州領隨縣光化安貴平林順義五縣貞觀十年割唐州棗陽來屬天寶元年改爲漢東郡乾元元年復爲隨州今郡城古隨國之地皇朝乾德四年升爲崇義軍節度尋改崇信軍

領縣四

隨縣 棗陽 唐城 光化

州境

東西三百七十里 南北二百一十里

四至八到

東北至東京一千一百里

西北至西京一千一百六十五里

西北至長安一千四百三十五里

東至安州一百五十五里

南至郢州四百六十里

西至襄州三百五十里

北至唐州三百六十里

東至申州二百四十四里



西北至唐州四百三十五里

東南至安州三百六十里

戶

唐開元戶二萬六千九百

皇朝戶主三千一百六十四客三千四十九

風俗

同唐州尤多獵山伐木

人物無

土產

蒲黃 枳實 會羅 柰花綾 小絹 葛 覆

盆子

隨縣舊十二鄉今二鄉漢舊縣後漢初平林兵起此邑今邑

東北有平林鄉即王常起兵之所梁立曲陽郡後

西魏復得其地因立郡于此 三鍾山在縣東五

十里山有石狀如覆鍾 鸚鵡山在縣東北百十

五里石狀如鸚鵡 隨侯堂 厲鄉左傳楚人伐

徐齊師曹師伐厲以救之 九井荊州記云厲鄉

西有壑兩重壑內有地俗謂之神農宅中有九井

汲一井則八井震動民多不敢觸在縣北一百里

斷蛇邱在縣西北一十五里按搜神記隨侯出



獵見白蛇被傷乃築坻于縣東北骸山側牧養既愈放之後銜徑寸珠以報德 隨侯墓在縣北二十里地志云隨縣北二十五里有隨侯墓今里數不同以古今尺步有異 隋文帝廟在州東南一里天寶七年置 季梁廟在州南八十步按左傳楚武王侵隨而求成焉隨少師請追楚師季梁止之曰天方授楚楚之羸其誘我也君何急焉君姑修政而親兄弟之國庶免于難隨侯懼而修政楚不敢伐人思其德爲廟祀焉 厲山在縣北一百里高一里荊州記云隨地有厲鄉村下有一穴是

神農所生穴也穴口方一步容數人立今穴口石上有神農廟在 驢泉山在縣北九十里上有池旱不涸昔出神驢故以爲名荊州記云驢泉山石溷潤牛馬經過貪其甘不能去土人云牛馬解逸卽此山尋之

棗陽縣

西北二百里舊十五鄉今一鄉

本漢蔡陽縣地後魏于此立

南荊州隋大業初改置春陵郡仍改邑爲棗陽縣唐初郡廢而邑隸隨州 光武故址在今縣南有白水源 春陵故城在今縣東漢文帝時以春陵之國地多卑濕因割蔡陽之白水上唐二鄉爲春



陵侯邑自零道縣徙于此識所謂白水真人處  
襄鄉故城漢為縣今廢城在今縣東北 下澁戍  
梁天監中置在縣東南一百里後魏宣武帝正光  
初南伐破之置為鎮後梁又收復之卻為郡即此  
戍也

唐城縣

西北一百五十里  
舊十二鄉今一鄉

漢隨縣地後魏于此置澌

西縣兼立義陽郡後又改為肆州或曰唐州隋廢  
之唐開元二十五年以容戶編成十二鄉置唐城  
縣後梁改為漢東縣漢初復舊 唐鄉左氏傳云  
晉楚戰于邲唐侯為左拒杜注云唐侯楚之小國

即此 古唐城自梁朝乾化三年改為漢東縣後  
唐同光元年復為唐城晉天福元年又改為漢東  
漢乾祐元年卻改為唐城縣

光化縣

南三十四里舊  
五鄉今一鄉

自漢至宋為隨縣之地南齊

立為安化縣後為西魏文帝克之改為光化縣

錫水在縣西北十里源出隨縣大浩山荊州記云

厲山下有厲鄉村臨錫水 楚子城在縣北十八

里左傳桓公八年楚子合諸侯于沈鹿黃隨不會

使蘧章讓黃楚子伐隨因築此城以逼隨故號楚

子城



郢州

郢州富水郡今歷代所屬與竟陵郡同二漢屬江夏

郡地晉宋以來為竟陵郡地梁時即南司北新二

州之境西魏分屬安州武帝分置石城郡後于石

城置郢州隋煬帝初廢州置安陸竟陵二郡唐武

德四年併二郡立溫州于長壽縣置郢州京山藍

水二縣屬焉七年廢基州以章山來屬貞觀元年

省藍水入長壽又廢郢州以長壽屬溫州章山屬

荊州十七年廢溫州仍舊置郢州治京山天寶元

年改為富水郡乾元元年復為郢州

元領縣三

今二

長壽 京山

一縣廢

富水併入京山

州境

東西一百六十五里 南北五百二十五里

四至八到

北至東京一千二百里

西北至西京一千二十五里

西北至長安一千三百八十五里



東至安州三百二十九里

南至復州三百里

西至江陵府二百八里

北至襄州三百一十六里

東南至復州界一百五十六里

西南至江陵府界八十里

西北至襄陽界三百一十六里

東北至隨州四百六十里

戶

唐開元戶一萬二千

皇朝戶主一千三百八客二千六百五十八

風俗

同荊州然清明節鄉落唱水調歌

人物

宋玉郢人

土產

紵布 丹參 牛膝 貝母貢

長壽縣舊十二鄉今二鄉漢為竟陵縣地屬江夏郡晉武帝

改為長壽縣屬竟陵郡後周立郡于此而縣隸焉

偃月城郡國志云竟陵有偃月城城三面漳水



擁焉 武陵山郡國志云左傳謂楚武王卒于櫛木之下即此山也地又名武陵 青泥池即三國時樂進與關公相拒之所亦曰櫛木山在縣東一里 竟陵故城漢為縣西四十步 金港在縣南二百步源出櫛木山 激水在縣北二十里源出京山縣東 白雪樓基在州子城西 激河池在縣北十五里南流合激河西入漢江 龜鶴池在縣西十步乃南昌尉梅福未登仙時養龜鶴池 金鷄冢在縣南六十里

京山縣 東一百一十里舊四鄉今十一鄉 歷晉宋以來為新陽縣梁

改為新州因舊邑之名西魏改為溫州隋初廢州改為京山縣因界內京山為名 倪子山在縣東南四十五里 張良山在縣北十里山有張良走馬路至今不生草木 鴨嘴山在縣南二里 泗河在縣西四十里東入復州竟陵縣界 溫泉湯在縣東十五里其泉有十八眼 廢富水縣在州北二百四十里隋置因界內富川水為名皇朝乾隆二年併入京山縣 富河在縣北一百里從隨州隨縣來入安州應城縣 新市故城後漢為縣故城在縣東北



復州

復州

竟陵郡今理景陵縣

禹貢荊州之域虞舜及周地屬不改

春秋戰國時屬楚秦屬南郡于漢十三州在荊州部卽江夏之竟陵縣地晉分置竟陵郡宋齊因之後周得之以其地置城復二州隋初如之煬帝廢州於舊郢州置竟陵郡今富水縣是也於舊復州卻立沔陽郡唐武德五年改爲復州治竟陵縣七年移理沔陽天寶元年改爲竟陵郡乾元元年復爲復州晉天福五年升爲防禦州

元領縣三

今二

景陵 沔陽

一縣割出

監利

入荊州境

州境

東西一百八十里

南北四百五十里

四至八到

北至東京一千四百里

西北至西京一千四百二十五里

西北至長安一千六百八十五里

東至舊沔州陸路三百四十里水路七百里



南至沔陽縣陸路一百四十里自縣南至岳州水路五百里

西至江陵府四百八十里

北至郢州私路二百五十里官路三百里

東南至蜀江水流為界七百四十里

西南至赤岸港為界三百五十七里

西北至乞火山東與郢州為界三百五十四里

東北至安州三百四十里

戶

唐開元戶八千二百一十

皇朝戶主三千一百一十七客四千三百一十一

風俗同荆襄

人物無

土產

白苧布 牛膝 狼毒 大戟 烏喙 鹿皮

景陵縣舊八鄉今四鄉本漢竟陵縣屬江夏郡盛弘之荊州

記云晉元康九年分江夏郡置竟陵郡而縣屬焉

晉天福初改為景陵縣 巾戍山水經云竟陵郡

有巾戍山晉獲銅鐘七枚于此 五華山在縣東

北七十里周地圖記云五華山山嶺連屬北接郢



州卽此山是也 沔水卽春秋謂昭王南征乘膠船以進尋沒此水 夏水郡國志古滄浪之水漁父所歌歌于此水其側又有熨斗陂存 邾縣城故漢縣廢城今在縣東 雲夢城郡國志云竟陵城西大澤卽古雲夢澤也 卻月城在河口魏將黃祖所守之城

沔陽縣

南一百二十里舊四鄉今二鄉

本漢沔陽縣地又郡國志云

沔陽縣卽楚王城也 七里沔按周地圖記云夏水合瀦水同入漢自漢入瀦水名爲七里沔卽屈原逢漁父與言濯纓鼓枻而去之處 沔水水自

西入大江晉鎮南將軍杜元凱爲荊州刺史自開陽口起夏水達巴陵千餘里內瀉長江之險外通零桂之漕 夏水水自南入大江一名長夏水西南自監利縣界流入水經云沔水又東南逕江夏雲杜縣東夏水從西來注之爲中夏水荊州圖副云此夏水旣非山流有涪川瀦冬斷夏通故云夏水 大隱林郡國志云沔陽大隱林又有小隱林南有隱磯山是漁父釣所 雲杜故城漢爲縣故城在今縣西北 石城在縣東南三百里古保聚之所 鼉湖在縣東二十里 馬骨坂楚平王牧



太平寰宇記卷之一百四十四  
馬馬遺骨于此坂 白猿廟郡國志云沔陽有白猿廟卽楚平王獲白猿于此立廟 魚復縣故城在縣東十五里

校勘

隨州

棗陽縣

下澁戍後魏宣武帝正光初南伐破之置爲鎮

按後魏紀年宣武帝有正始而孝明帝有正光然未見破下澁戍事所出未知孰誤

太平寰宇記卷之一百四十四終

太平寰宇記

卷之一百四十四

三



太平寰宇記卷之一百四十五

山南東道四

襄州

光化軍

襄州

襄州襄陽郡今理襄陽縣禹貢荆豫二州之界禹貢曰荆及衡

陽惟荆州又曰荆河惟豫州即襄鄧二州之界也

周禮職方氏正南曰荆州其川江漢亦荆州之分

周時即穀鄧鄖盧羅郤之地春秋時屬楚習鑿齒

襄陽記云襄陽城本楚之邑檀溪帶其西峴山互

其南為楚國之北津也楚有二津謂從襄陽渡沔



太平寰宇記卷之一百四十五  
自南陽界出方城關是也通周鄭晉衛之道其東則從漢津渡江夏出平臯關是也通陳蔡齊宋之道又爲秦南陽郡卽昭王十六年使左更錯伐楚取鄧封公子悝始置南陽郡兩漢爲鄧縣之地荆州圖副云建安十三年曹操平荆州始置襄陽郡以地在襄山之陽爲名按郡西極梁州南包臨沮北接陰鄧襄陽爲郡始于此矣又楚地記云漢江之北爲南陽漢江之南爲南郡蜀關公攻沒于禁等七軍兵勢甚盛獨襄陽徐晃屯守不下操謂晃曰全襄陽徐公之力也後吳大帝帥兵向西時曹

仁鎮此司馬宣王言于魏帝曰襄陽水陸之衝寇之要地不可失也魏自赤壁敗後因失江陵於是荆州都督專在宛沔此地屬吳郭仲產云劉表嗣子北降襄陽沔北爲戰伐之地自羊公鎮此吳不復入東晉大將軍庾翼將謀北伐遂鎮襄陽

元領縣七

今六

襄陽 鄧城 穀城 中廬 宜城 南漳

一縣割出

樂鄉

入荆門軍

州境



東西二百四十六里 南北三百六十七里

四至八到

東北至東京九百里

北至西京八百五十五里

西北至長安一千八十五里

東至隨州三百五十里

南至荆門軍三百二十五里至荊州四百七十里

西至房州四百七十里水路五百八十四里

北至鄧州一百八十二里

西至均州三百六十里

東南至鄧州三百七十里

西南至陝州六百一十九里

西至光化軍一百八十里

東北至唐州二百五十里

戶

唐開元戶八萬九千一百

皇朝戶主一萬一千三百六十三客一萬五千五百二十九

風俗

襄陽風俗記云屈原五月五日投汨羅江其妻每



太平寰宇記卷之百四十五  
投食於水以祭之原通夢告妻所祭食皆為蛟龍  
所奪龍畏五色絲及竹故妻以竹為粽以五色絲  
纏之今俗其日皆帶五色絲食粽言免蛟龍之患  
又原五日先沈十日而出楚人於水次迅楫爭馳  
櫂歌亂響有悽斷之聲意存拯溺喧震川陸風俗  
遷流遂有競渡之戲人多偷墮信鬼神崇釋教

人物

卞和

南漳人

王延壽

字文考宜城人  
侍中逸之子

龐德公

襄陽人

人居峴山之南未曾入城

龐統

字士元

向朗

字臣遠仕蜀光祿勳

馬良

字季常宜城人兄弟五人並有才名諺曰馬氏五常白眉最良

向寵

宜城人

羅友

字宅仁襄陽人

習鑿齒

襄陽人字彥威著漢晉春秋

唐張柬之

之

襄陽人相則天首謀誅張易之以功拜天官尚書鳳閣鸞臺三品封漢陽王

孟浩

然

襄陽人

杜審言

襄州襄陽人孫甫

鮑防

襄州人

皮日

休

字襲美襄陽人

席豫

字建侯襄陽人

柳渾

字夷曠襄陽人篤學登第

土產

貢鹹乾魚

丹麀皮

火麻布

庫路真

麝香

鼈甲

縮砂

弓弩材

漆器

宜城出美酒

今在宜城縣也俗號宜城美酒為竹葉杯

襄陽耆舊傳云峴山下漢

水中出鱖魚

味極肥而美襄陽人採捕遂以槎斷水因謂之槎頭縮項鱖魚為水族上

味孟浩然詩試垂竹竿釣果得槎頭鱖是也



襄陽縣

舊三十鄉  
今四鄉

本漢舊縣屬南郡應劭曰在襄水

之陽縣因名焉州郡志云襄陽本漢中廬縣地漢初徙駱越之人居之望楚山在縣南三里鮑至

南雍州記凡三名一名馬鞍山又名災山宋元嘉中武陵王駿爲刺史屢登陟焉因其舊名以望見鄆城改爲望楚山後遂龍飛爲孝武帝所望之處時人號爲鳳嶺高處有三磴是劉弘山簡等九日宴賞之所峴山在縣南九里羊祜常與從事鄒湛等共登慨然嘆息曰自有宇宙便有此山由來賢達勝士登此眺望如我與卿者多矣皆湮沒不

聞使人悲傷如百年後有知魂魄猶應登此山也湛等對曰公德冠四海道嗣前哲令聞令望必與此山俱傳若湛輩乃當如公言耳後以州人思慕遂立羊公廟并碑于此山石梁山南雍州記云石梁山形如橋梁也白雲起卽崇朝而雨人以爲準萬山在縣西八里一名漢臯山習鑿齒襄陽記云山北隔沔水父老相傳卽交甫見遊女弄珠之處漢水盛弘之荊州記城北沔水澗潭極深先有蛟龍年爲人害鄧遐爲襄陽太守氣果兼人拔劍入水蛟繞其足遐因揮劍截蛟被傷流血丹



水勇冠當時自後無復蛟患矣 柳子水卽池之別派也 檀溪卽梁高祖沈竹木于此溪中先主乘的盧躍過之所也 涑水亦名襄水荆楚之地水駕山而上者皆呼爲襄上也今土人呼涑水上流亦呼爲襄水名卽無定故陸澄地理志云襄陽無襄水也又按襄沔記云中廬有涑水注于沔此水中有物如三四歲小兒膝頭如虎掌爪常沒水中出膝頭示人小兒不知者欲取弄之輒便啖人或人有生得者摘其鼻厭可小使之名曰水虎 習郁池在縣東南十五里襄陽記云峴南八百步而下道百步有習家魚池郁將死勅其長子葬于池側池中起釣臺按郁卽鑿齒之先也餘事跡解鹿門廟 墮淚碑在縣東九里晉羊祜之鎮襄陽有功德于人及卒百姓于峴山祜平生遊憩之所建碑立廟歲時饗祭望其碑莫不流涕杜預因名墮淚碑 貞女樓按南雍州記云王整之姊適衛玠十六而寡父母欲嫁之乃自截鼻以誓墓前柏樹爲之連理 高陽池在縣東南十五里晉山簡字季倫鎮襄陽每臨此池未嘗不大醉而還時人爲之歌曰山公出何許往至高陽池日夕倒載歸



酩酊無所知時時能騎馬倒著白接羅舉鞭問葛  
疆何如并州兒通典云馬鞍山昔劉弘山簡九日  
宴處 古堤襄陽城有古堤皆後漢胡烈所築嘗  
為襄陽太守惠化及人塞補決隄民因歌曰譬春  
之陽如冬之日耕者讓畔百姓豐溢惟我胡父恩  
惠難置 冠蓋里盛弘之荊州記云襄陽郡峴首  
山南至宜城百餘里其閒雕墻峻宇閭闔填列漢  
宣帝末其中有卿士刺史二千石數十家朱軒駟  
輝華蓋連延掩映于太山廟下荊州刺史行部見  
之欽嘆其盛勅號太山廟道為冠蓋里 諸葛亮

宅按蜀志云先帝三顧臣于草廬之中即此宅也  
今有井深四丈廣尺五寸迄今疊砌如初 桓溫  
冢冢聞鼓角聲襄陽必有軍旅 古魚井按南雍  
州記云古魚井內一魚無肉唯骨相連耳 張漢  
陽碑在縣西二里即東之也 孟浩然碑在縣東  
南十二里 杜預碑在縣東南九里峴山上

鄧城縣 北十三里舊十鄉今八鄉 漢鄧縣地即古樊城齊書云

建武中大將軍曹虎鎮此魏孝文率兵萬人圍樊  
城經月不下即此城也荊州圖副郭仲產摯虞等  
記俱云樊本仲山甫之國隋改河南郡為鄧城郡



廢棘陽襄鄉二縣立安養縣唐天寶中改為臨漢縣以臨漢江為名貞元二十一年以襄州為襄陽府徙臨漢縣于東古鄧地乃改為鄧城縣宛水自鄧州新野縣界流入鄧城即古鄧子之國鄧之南鄙夫人城即晉朱序為刺史母韓夫人深識兵勢知城西北角必偏受敵率奴婢斜築二十許丈以捍賊後苻丕果以兵攻此處不克而退因號夫人城查牙山在縣東四十里泌河在縣東北一百一十里流經縣界與白河合呼鷹臺在縣東南一里劉表所築表往登之鼓琴作樂有

野鷹來至因名泌白水在縣東北九十七里是

泌白相合河口

穀城縣

西北四十五里舊十八鄉今七鄉

本春秋穀國漢為筑陽縣

自漢魏迄今並為筑陽縣地宋于此置扶風郡隋

開皇七年改為穀城縣漢陰城在縣北漢為縣

今廢城存鄧城在縣東北漢書地理志南陽即

漢蕭何所封也按說文鄧作管作旦二切南陽有

鄧縣鄧昨何切沛國縣若云何之所封何在沛又

云此邑乃高后封何夫人之邑也蕭相國祠鮑

至南雍州記云何昔受封于此廟今相傳為城隍



神 蕤山在縣西六十里諸山雲起此山無雲終  
不降雨諸山無雲此山雲起必降大雨土人以爲  
恆驗因山蕤爲名山上有孤竹三莖三年生一筍  
幹就竹死代謝如春秋又有白鹿二紫羆一人不  
敢犯之 穀神山在縣西十里有石城號曰穀  
神山 筑水在縣南一百步陸澄地理志云筑水  
會沔水之處謂之筑口 粉水在縣北六十里出  
房州房陵縣東流入縣南雍州記云蕭何夫人漬  
粉鮮潔異于諸水因立名 穀城在縣北五里南  
雍州記云穀伯綏之舊國也昔城門前有石人刻  
其腹曰摩鞞慎莫言亦金人緘口銘之流也今無  
矣

中廬縣

西南五十八里  
舊六鄉今三鄉

本漢中廬縣地春秋廬戎之

國南齊于此立義清縣屬義安郡唐貞觀二年自  
今縣東北三十里移于今所在州西五十三里復  
爲中廬縣 山都縣城秦之邑名廢城在今縣東  
北

宜城縣

南九十五里  
元二鄉

本楚之鄢都在漢爲鄢縣地宋大

明元年以胡人流寓者立華山郡于大隄村卽今  
縣也後魏改華山郡爲宜城郡分新野郡之池陽



縣地因立率道縣屬威寧郡後周保定四年省宜城郡入率道縣今縣南石宜城卽舊郡唐武德四年以此邑屬都州貞觀八年廢都州改屬襄州天寶元年改爲宜城縣從古郡名 蠻水西自義清縣界流入東南經縣西去縣三十里有白公湍南雍州記云秦將白起伐楚之日涉此水而濟因號白公湍今有三磧亦名三洲赤石湍 大隄城今縣城也其俗相傳爲大隄城至今不改 黎丘城漢縣廢城在今縣北 宜城故城漢縣在今縣南其地出美酒 鹿門廟習鑿齒襄陽記云習郁爲侍中時從光武幸黎丘與光武通夢見蘇嶺山神光武嘉之拜大鴻臚錄其前後功封襄陽侯使立蘇嶺之祠刻二石鹿夾祠神道百姓謂爲鹿門廟 木香村段成式別業於此村村生異竹成式圖送徐商商爲稱謝 廢樂鄉縣在州南二百二十里舊管四鄉本春秋都國之地迄今有若鄉在若水之傍晉隆安五年於今城戍置樂鄉縣屬武寧郡後魏廢帝元年置都州貞觀六年廢都州以其地卻屬襄州周顯德二年併入宜城縣皇朝開寶五年割隸荆門軍 都亭山在縣西南山上有城



壘極峻拔爲險隘之所一名中山城 郟水亦名  
女泉系本云郟元姓之國黃帝之子昌意降居若  
水爲諸侯此其後也

南漳縣

西南一百四十里  
舊五鄉今四鄉

漢之臨沮縣地屬南郡郟

仲產南雍州記云晉平吳割臨沮之北鄉立上黃  
縣後魏又置重陽縣周改爲思安縣隋文帝三年  
改爲南漳縣唐武德二年分襄陽郡南漳縣于今  
所置貞觀九年廢縣來屬襄州 荆山禹貢荆及  
衡陽惟荆州韓子卞和得玉於楚荆山三面險絕  
惟東南一隅纔通人徑頂上有池周迴四十餘步

喬松翠柏列繞其旁并有石室相傳爲卞和宅

柎山習鑿齒襄陽記吳時朱然諸葛瑾萬彧從柎  
中尋山險道出柎中柎音如榆柎之柎其地在上  
黃西界去襄陽城一百五十里按此是地名非山  
稱也蓋以其地去山密邇因爲山名舊傳云司馬  
宣王鑿八疊山開路于此停阻以屈曲八疊爲名  
清溪山其山高峻庾仲雍荊州記云臨沮縣清  
溪山山東有泉晉郭璞爲臨沮長常遊此賦遊仙  
詩云青溪千餘仞中有一道士卽此也 臨漳山  
在縣西一百八十里本雞頭山北臨漳水 八疊



山在縣西四十五里解在前

光化軍

光化軍

理乾德縣

本襄州之陰城縣地後廢為鎮故城在

今穀城縣北皇朝乾德二年四月改鎮為光化軍

仍割穀城縣遵教翔鸞漢均等三鄉置乾德縣以

年號為名

領縣一

乾德

軍境

東西八十五里

南北四十一里

四至八到

新置軍未有至東西京并長安里數

東至鄧州穰縣松陽堰為界三十一里

西至均州武當山為界五十五里

南至襄州穀城縣公田村為界一十五里

北至鄧州穰縣曹溪潤為界三十一里

西南至房州永清縣石桶村為界三百里

東南至襄州鄧城縣古樓村為界三十里

東北至鄧州穰縣大充村為界二十九里

西北至均州武當縣博口泉潤為界七十一里



戶

皇朝戶主三千六百八十五客三千三百四十五

風俗同襄州

土產

元無所貢及土產物

乾德縣

元三鄉

本漢穀城縣遵教翔鸞漢均三縣乾德

三年置以年號名縣

漢江經縣

馬窟山在縣

東南六里下有窟按南雍州記漢時有馬百匹從

此窟出舊名馬頭山勅改為馬窟 溫水在縣南

七里西南流入漢江南雍州記云溫水出紅農縣

境冬月微溫 固王古城在縣東北五里按穀城

縣圖經云晉咸寧中封扶風王子暢為順陽王城

內有順陽碑 五陌洲在縣西南四里南雍州記

鄴城南四里有五陌村榆樹連理異本合幹高四

丈鄉人以為社其洲並樹在五陌村因此為名其

樹今已枯 漢鄴縣縣北三里西臨漢江

太平寰宇記卷之一百四十五終



太平寰宇記卷之一百四十六

山南東道五

荊州

荊門軍

荊州

荊州

江陵郡今江陵縣

禹貢荆及衡陽惟荊州史記以為鶉

首楚之分自張十八度至軫十二度楚之分野春

秋以來楚國之都謂之郢都西接巴巫東連雲夢

亦一都會之所秦以鄢郢為南郡今州也秦又取

巫中地為黔中郡以楚之漢北立南陽郡襄王子

熊元為考烈王徙于壽春命之曰郢其庶子負芻



九平寰宇記卷之一百四十九  
篡弟哀王而立五年爲秦將王翦所虜楚自此滅  
焉項羽改南郡爲臨江國漢初復爲南郡置南蠻  
校尉以領之高帝末分長沙爲桂陽郡改黔中爲  
武陵郡分南郡爲江夏郡景帝又改南郡爲臨江  
國武帝元封元年置刺史部十三州分荆州置交  
州建初二年徙鉅鹿王恭爲江陵王三公上言江  
陵在京師正南不可以封乃徙封安陸王漢末劉  
表爲荆州牧表卒子琮代位魏恐蜀先王據之於  
是來伐敗于赤壁荆州入蜀先主得益州吳大帝  
就先主求還荆州不得遂來伐取長沙桂陽零陵

三郡蜀求和遂分荆州以長沙江夏桂陽以東屬  
吳南郡零陵武陵以西屬蜀蜀以糜芳爲南郡太  
守及先主歿後所分之地悉復屬吳而荆州南北  
雙立故三國志魏荆州理宛卽今南陽郡是也吳  
荆州理江陵今郡是也又晉書云荆州領郡十九  
理襄陽洎平吳復理南郡卽今所也郡改爲新郡  
又分南郡江南爲南平郡頗爲重鎮故晉書桓元  
子以永和元年督荆州鎮夏口八年還江陵始營  
城府盛弘之荆州記云元嘉十四年荆州所隸三  
十郡自晉室東遷王居建業則以荆揚爲京師根



太平寰宇記卷之一百四十六  
本之所寄荆楚爲重鎮上流之所總擬周之分陝  
故有西陝之號焉自後桓沖爲大將軍屯上明使  
劉波守江陵是也又晉列傳羊叔子杜元凱繼理  
荊州或鎮襄陽或鎮江陵王敦爲刺史理武昌至  
桓元子陶侃王忱始于江陵營城府此後嘗以江  
陵爲州理宋武帝分置荆司郢雍湘五州皆州城  
地也齊梁因之按安□志荊州之境含帶蠻蠻土  
地遼延稱爲殷曠江左大鎮莫過荆揚若非時望  
名賢不居此郡梁初陷於魏後復之梁元帝爲湘  
東王荊州刺史居之凡二十年侯景旣平卽位遂

都之爲西魏所陷復遷後梁居之位爲藩國又因  
置總管府隋初改爲江陵鎮以隸襄州至七年改  
爲荊州煬帝初復爲南郡義寧二年爲蕭銑所據  
唐武德四年平銑改爲荊州領江陵枝江長林安  
興石首松滋公安七縣五年荊州置大總管管荆  
辰朗澧東松沈基復巴睦崇峽平十三州統潭桂  
交循夔高康欽尹九州六年改平州爲玉州改巴  
州爲岳州七年廢基州入郢州其年改大總管爲  
大都督督荆辰澧朗東松岳峽玉八州仍統潭桂  
交夔高欽尹等七州其沈復睦崇四州循康二州



都督並不統八年廢玉州以當陽縣來屬貞觀元年廢郢州以章山來屬二年降爲都督府唯督前七州而已其桂潭等七州不統也八年廢東松州入峽州又省章山入長林十年辰州改隸黔州都督荆峽澧朗岳五州都督從三品荆州領江陵枝江當陽長林安興石首松滋公安等八縣龍朔二年升爲大都督督荆峽岳復郢五州天寶元年改爲江陵郡乾元元年三月復爲荆州大都督府自至德後中原多故襄鄧百姓兩京衣冠盡投江湖故荆南井邑十倍其初仍置荆南節度上元元年

九月置南都以荆州爲江陵府長史爲尹官寮制置一準兩京以舊相呂諲爲尹充荆南節度使領澧朗峽夔忠歸萬等八州又割黔中之涪湖南之岳潭衡郴邵永道連八州增置萬人軍以永平爲名二年置長寧縣于郭內與江陵尹衛伯玉以湖南闊遠請于衡州置防禦使自此八州別置使改屬江南西道

元領縣八

今九

江陵 枝江 公安 松滋 石首 建寧 潛

江 玉沙

以上三縣新置

監利

復州割到



三縣割出

荆門

別為軍

當陽

入荆門

武安

並入荆門軍

州境

東西五百五十里

南北七百五十五里

四至八到

東至東京一千八百八十五里

北至西京一千三百九十五里

西北至長安一千六百五十五里

北至郢州三百里

東至復州陸路三百五十里水路八百里

南至澧州三百里

西至峽州水路三百三十里

北至襄州四百五十里

西至岳州水路五百七十里

西南至澧州四百五十里

西北至峽州遠安縣界二百六十五里

東北至郢州長壽縣界二百二十里

戶

唐開元戶八萬六千八百

皇朝戶主三萬六千一百七十四客二萬七千二



風俗

荆之為言強也陽盛物堅其氣急悍故人多剽悍唐至德之後流傭聚食者眾五方雜居風俗大變然五月五日競渡戲船楚風最尙廢業耗民莫甚於此皇朝有國以來已革其弊又人俗多居于江津諸洲

姓氏

武昌郡六姓 吳 伍 程 史 龍 郢  
武陵郡三姓 卞 伍 龔

人物

文種 楚南郢人 後相越 江上丈人 子胥進千金之劍丈人不受 伍  
員 監利人 陸通 字接輿楚人謂 申包胥 楚人與伍員善  
老萊子 楚人年八十服斑斕衣為嬰兒戲于親前 漢陰叟 楚人居漢水之陰子貢南遊見丈人為圃鑿池抱甕出灌園用多力子貢教鑿木為桔槔丈人曰吾聞有機事者必有心也 後漢胡廣 字伯始華容人三登太尉再  
劉凝之 字志安枝江人隱居不仕 劉之遴 字司貞虬子八歲能文 劉  
之亨 字嘉會虬子為司農卿 唐劉伯 江陵人封中

土產

綿絹 方綾 甘草 烏梅 貝母 柑子 橙



子白魚

橘史記云江陵千樹橘與千戶侯等又江津諸洲其土沃壤所利丹石

齒革羽毛

松滋縣出碧澗茶沈子曰茶餅茶芽今貢

江陵縣舊十三鄉今七鄉漢舊縣屬南郡史記曰江陵故郡

都西通巴巫東有雲夢之饒秦昭王二十九年白

起伐楚取郢置南郡分爲江陵縣漢景帝改郡爲

國故荊州記云昔荊州城掘地得石函有鐵契云

楚都郢邑代無絕 畫扇峯荊州記云修竹亭西

一峯迥然西映落日遠而望之全如畫扇 景里

洲三國魏將夏侯尙圍南郡作浮橋渡景里洲今

在郡西 龍洲寵洲盛弘之荊州記云龍寵二洲

之間舊云多魚而漁者投罟揮網輒絳絕乃有水

客泗而視之見水下有石牛二頭嘗爲網礙故漁

者懲之皆鼓枻而去 枚迴洲在縣西南六十里

荊州志云自籍州次東大洲有三名城首日枚迴

盛弘之記以爲村名舊云是梅槐合生成樹故謂

之梅槐中名景里下名燕尾荆南志云此洲北江

呼爲薺薇江始自梅槐下迄燕尾上有奉城故江

津長所居家語云江出岷山其源可以濫觴及至

江津不方舟避風不可以濟郭璞江賦所謂濟江

津以起漲言其深廣 瀆水出紀南赤坂岡下流



入城今名曰子胥瀆蓋入郢所開也 夏口水左  
傳吳伐楚沈尹戍奔于夏汭杜注漢水曲入江今  
名夏口盛弘之云夏首又東二十餘里有滑口二  
水之間謂之夏洲首尾七百里華容監利二縣在  
其中矣楚辭云過夏首而西浮郭仲產云此水冬  
塞夏通因名夏水也 荒谷水荊州記云春秋所  
謂莫敖緼于荒谷是也 涌水江陵城東南五十  
里有涌水源東行百餘里會于江左傳云閻敖游  
涌而逸也 東天井荊州記云在天井臺之東井  
周迴二里許深不可測中有潛室人時見之則有

兵寇祈之多驗又渚宮故事云江陵城東二十里  
有天井周迴二里深不可測旱而禱之則大雨時  
至 高沙湖在枚迴洲上荊南志云翠澤平晶水  
陸彌曠菱荷殷生麟羽滋阜湖南林野清曠可以  
棲托故徵士宗炳昔常家焉北有小水自湖通江  
謂之曾口又荆渚故事云江陵城西二十里高沙  
湖其中多魚 五葉湖荊南志云昔湖側有工人  
張被五葉同居因以爲名 馬鞍溪昔子胥奔吳  
避難于此 紀南城左傳蔡侯鄭伯會于鄧始懼  
楚也杜注楚國今南郡江陵縣北紀南城也 故



郢城在縣東北十二里漢志有郢縣云楚別邑左  
氏傳楚莊王襲羣舒使公子變與子儀守二子作  
亂城郢至襄王十四年子囊臨終遺言必城郢太  
史公曰楚都城至平王而更城郢也杜預以爲史  
所言郢者卽州北紀南城是盛弘之荊州記云昭  
王十年吳通漳水灌紀南入赤湖進灌城郢遂破  
楚則是前攻紀南而後破郢也伍端休江陵記云  
南門三門一名龍門一名修門離騷九章曰過夏  
首而西浮顧龍門而不見招魂曰魂兮歸來入修  
門王逸注郢城門也 故奉城在燕尾洲上郭仲

產荊州記云江津長車之領百家主渡江南渚州  
貢奉謂之奉城 冶父城盛弘之荊州記云荒谷  
西北有苑號曰王園北有小城名曰冶父城左傳  
所謂莫敖縊于荒谷羣帥囚于冶父是也 蚌城  
在江內燕尾洲上相傳云饑年人民結侶拾蚌止  
憩于此故以爲名城卽關公所築以防吳魏 津  
相故城漢爲縣故城在今縣東 渚宮左傳楚子  
西沿漢沂江將入郢王在渚宮下見之 江堤梁  
始興忠武王憺字僧達爲荊州刺史過大江水溢  
堤壞憺親率將吏冒雨計所壞丈尺築之雨勢甚



太平寰宇記卷之一百四十六  
猛人皆恐懼或請避之王曰王尊尙欲身塞河堤  
我獨何心以免乃登堤嘆息終日輟膳刑白馬祭  
江神酌酒于流以身爲百姓請命言終而水退堤  
出 湘東苑渚宮故事云湘東王子子城中穿構  
池山長數百丈植蓮緣岸雜以奇木其上有通波  
閣跨水爲之南有芙蓉堂東有稷飲堂堂後有隱  
士亭亭北有正武堂堂前有堦塼馬坪音呼其西有  
鄉射堂堂置行堦可得移動東南有連理堂堂前  
棕生連理太清初生比柯連理當時以爲湘東踐  
阼之瑞北有映月亭修竹堂臨水齋齋前高山有

石洞潛行苑中二百餘步山上有陽雲樓樓極高  
峻遠近皆見北有臨風亭明月樓顏之推詩云屢  
陪明月宴並將軍扈義所造 竹林堂宋臨川王  
義慶所作梁元帝因而修之亭前有竹名桂竹郭  
璞云桂竹出始興小桂縣來風防露上合下疏每  
日出羅紈金翠春光秋月隔林而望若花開也其  
西有篠箭冬月抽筍似桂而辛呂覽有駱越之篠  
爾雅有會稽之竹箭隆暑赫曦但有涼氣入其下  
者咸以御風其中多種薔薇劉宅紫薔薇康家四  
出薔薇白馬里薔薇成百里鄉長沙千葉薔薇多



有品彙並以長格校其上使花葉相通其下有十  
閒花屋仰而望之則枝葉交映迫而察之則芬芳  
襲人新陽太守鄭哀送雌鶴在此堂畱其雄者尙  
在哀宅霜天月夜無日不鳴商旅江津聞而墮淚  
時有野鶴飛赴庭中驅之不去卽哀宅之雄也交  
頸頡頏撫翼聞奏鍾磬翻然共舞婉轉低昂妙會  
絃節其閒花卉雖繁竹林彌盛昔豫章以樹名郡  
酸棗以棘爲邦故號竹林堂 清暑臺一名大暑  
臺在江陵城東北二十一里 羅含宅渚宮記云  
安成王在鎮以羅含故宅錄事劉朗之嘗見一丈

夫衣冠甚偉披襟而立朗之驚問忽然失之未及  
還朗之以罪見黜人謂君章有神羅君章宅在江  
陵城西三里庾信亦嘗居之 郭仲產宅渚宮故  
事云郭爲南郡從事宅在枇杷寺南江陵城東十  
五里有枇杷寺其村亦名枇杷元嘉末起齋屋以  
竹爲櫺竹遂漸生枝條長數尺扶疏翡翠蔚然如  
屋仲產以爲祥俄而同義宣之謀被誅 萍實渚  
宮故事云宋文帝爲宜都王臨州有人獻王萍實  
六子大者如升小者如鶴卵圓而赤初莫有識者  
以問長史王華華曰此萍實也宣尼所謂王者之



應宋祚當卜年六百頃之宜都王卽位祚終于六十矣 子晉廟有枯樹庾子山感而成賦 梁河東王譽廟在江陵西北三十五里宣帝卽位收葬于此謚武桓王 諫獵冢卽樊姬墓也爲楚莊夫人今爲諫獵冢 章華臺在縣東三十三里楚靈成章華之臺願與諸侯落之按渚宮故事云靈王所築臺形三角 白碑驛在縣西北四十八里 梁宣明二帝陵唐開元二十一年建 楚莊冢在縣西龍山鄉三十里渚宮故事莊王墓前後陪葬十冢皆爲行列

枝江縣

西一百二十里舊十一鄉今十鄉

漢舊縣屬南郡古羅國之

地江沱出邑西東入江卽史記謂楚文王自丹陽徙都此亦曰丹陽卽今巴東郡是也唐上元元年析枝江縣置長寧縣于郡郭以視兩京赤縣至二年又廢枝江入長寧寄戶口實于長寧久之不便至大厯六年復廢長寧卻立枝江于舊地卽今邑也 百里洲荆州圖云其上寬廣土沃人豐陂潭所產足穰儉歲又特宜五穀洲首派別南爲外江北爲內江荆南志云縣界內洲大小凡三十七其十九有人居十八無人居盛弘之荆州記云縣南



太平寰宇記 卷之一百四十六  
自上明東及江津其中有九十九洲楚諺云洲不  
滿百故不出王者桓立有問鼎之志故增一爲百  
以充百數僭號旬時身屠宗滅及其傾覆洲亦消  
毀至宋文帝在藩忽生一洲果龍飛江表斯有驗  
矣三洲洲中最大號曰陽洲隴洲迴洲是百洲之  
數 獲湖宋沈攸之爲荊州刺史堰湖開瀆通引  
江水田多收穫故以獲名其湖 新洲渚宮故事  
云梁王僧辯滅侯景百寮勸進湘東王卽皇帝位  
柵江陵城周迴七十里時議遷都御史中丞劉穀  
等進曰臣等聞荆南之地有天子氣又聞渚宮洲

已滿百梁典云太清末枝江縣陽閣浦忽生一洲  
羣公上疏稱慶明年元帝卽位承聖末其洲與大  
岸相連唯九十九而已 蜀江在縣南九里

公安縣

東水路八十里  
舊八鄉今九鄉

卽後漢作唐縣地在西偏又

爲孱陵縣地俱屬吳之南郡荊州記云先主敗于  
襄陽奔荊州吳大帝推先主爲左將軍荊州牧鎮  
油口卽居此城時號先主爲公故名其城爲公安  
也 黃山字或作皇昔或呼爲睢山今鄉人或爲  
王山云宋大將軍謝晦被誅死于此山立廟因呼  
此神爲王山祠壇基址猶在 油水自松滋縣界



入一謂之白石水也 景口 淪口酈道元注水  
經云油水東有景口景口東復有淪口淪水南與  
景水合 孱陵城十三州志云吳大帝封呂蒙為  
孱陵侯即此也 馬頭戍在縣西北盛弘之荊州  
記云灌羊湖西三十里有馬頭戍吳大司馬陸抗  
所屯以對江津口與晉太傅羊祜相拒大宏信義  
抗有疾祜饋之藥抗即推心服之于時談者以為  
華元子反復見于今 香積山在縣西二百五十  
七里 麝香山在縣西二百七十里 涪港在縣  
西六十里

松滋縣

西南一百二十里 舊五鄉今六鄉

本漢舊縣今地志云松

滋古鳩茲地漢屬江陵郡後漢省魏復立之以屬  
安豐及廬江等郡廬江即廬州是也晉太康地志  
咸康三年以松滋流戶在荆土者立松滋縣以隸  
河東郡邑也至東晉孝武帝時荊州刺史桓沖以  
苻堅強盛自襄陽退屯之因上書云孱陵縣界地  
名上明田土膏良可以資業軍人在吳時樂鄉城  
以上四十餘里北枕大江西接三峽今縣西廢上  
明城即沖所築其樂鄉即吳陸抗所築皆在邑界  
涇山漢書地理志南郡高城縣涇山涇水所出



東入緜卽爲此也 巴山左氏傳巴人伐楚荆南志云巴人復遁而歸因有巴復村在山北故曰巴山也 明月山在縣西七十里山嶺灣灣如月九包山在縣西九十五里 石瓦山在縣西六十里 蜀江在縣北一里源自宜都縣來 劉虬墓渚宮故事松滋縣西有劉虬墓今陟岷寺卽虬宅石首縣東南水路二百里舊四鄉今三鄉唐武德四年置縣北有石首山取以爲名本漢華容縣之地也 石首山水經云大江右逕石首山北也 陽岐山在縣西一百步宋鮑明遠陽岐守風詩云洲迴風正悲江寒

霧未歇卽此也荆州記曰山無所出不足書本屬南平界范玄平記云故老相承云胡伯始以本縣境無山置此山上計偕簿 石門山梁邵陵王綸崇奉道士張京於此置觀以處之鑿石開徑其狀若門因名石門山與岳華容縣分半境爲之也 繡林山在楚望山前漢昭烈娶孫夫人于此錦繡如林 披甲湖在縣東六十里劉先主與曹戰飲馬披甲于此因名 曹屯湖在縣西二十五里相傳曹操屯兵于此 張屯湖在縣西十里昔張飛屯兵處 喪停港在縣西六十里晉謝麟爲荊州



太平寰宇記卷之一百四十六  
刺史卒經此停泊一夕雷電大風其棺自葬故名  
調絃亭在縣東六十里相傳伯牙鼓琴于此  
照影橋在縣西楚望山下云孫夫人照影于此  
望夫臺在楚望山上先主入蜀孫夫人鑿此望之  
今石臺猶存 劉郎浦在大江北漢昭烈娶孫夫  
人渡此 龍穴水經云大江右得龍穴水口注云  
江浦右迤也北對虎洲又洲之北有龍巢地名也  
昔夏禹濟江黃龍夾舟舟人失色無主禹笑曰吾  
受命于天竭力養民生性也死命也何憂龍哉于  
是二龍弭鱗掉尾而去故地俱取名焉

建寧縣

東二百三十里七鄉新置

唐元和十一年以人戶輸納不

便于是置徵科巡院皇朝乾德三年因之升爲建

寧縣 石龍山在縣東南六十五里下有石龍淙

石壁上有龍隱形踪

潛江縣

東一百一十里十二鄉新置

唐大中十一年以人戶輸納

不便置徵科巡院于白汭皇朝乾德三年因之升

爲潛江縣 漢山在縣北二十里自長林縣來至

獅子口經縣界

玉沙縣

南一百二十里五鄉新置

朱梁開平四年分漢江南爲白

沙徵科巡院皇朝乾德三年因之升爲玉沙縣



太平寰宇記卷之一百四十六  
白螺山在縣西南一百四十五里

監利縣

三十二里無鄉

本漢華容縣地荆州圖副云晉太康

五年立監利縣屬南郡梁開平三年以荆州割據  
遂屬荆州 章華臺在縣郭內 陶朱公冢在華  
容縣西碑見在 乾溪涌水皆在邑界 五花山  
在縣三里 雞鳴渡在縣北二十里

### 荆門軍

荆門軍本漢舊縣隋時廢卽荆襄之要津唐貞元二  
十一年復置唐末荆州高氏割據建爲軍領荆州  
當陽縣皇朝開寶五年割荆州之長林縣襄州之  
故樂鄉縣合爲一縣置于郭下

### 領縣二

長林 當陽

### 軍境

東西三百八十里 南北三百二十五里

### 四至八到

東北至東京一千三百里  
西北至西京一千七百里  
東至郢州漢江一百里  
西至峽州界二百八十里



南至荆南界一百五十五里

北至襄州界一百七十里

西南至荆南枝江縣界二百八十里

東南至荆南沅江縣界二百八十里

西北至襄州南漳縣界二百里

東北至郢州襄州界漢江一百八十里

戶

舊戶在襄荆二州籍

皇朝戶主一千七百三十四客二千三百三十六

風俗

土產

並與襄荆二州同

長林縣□□□□晉安帝隆安五年刺史桓玄立武寧

郡于故編縣城其屬有長林縣與郡俱立分編縣

所置也盛弘之荆州記云當陽東有櫟林長坂昔

時武寧至樂鄉八十里中拱樹修竹隱天蔽日長

林蓋取名于此武德四年于縣東界一百二里置

基州及章山縣七年廢基州以章山屬郢州州廢

屬荆州八年省入長林皇朝開寶五年割襄州故

樂鄉縣合為一縣來屬本軍樂鄉者即春秋都國



之地晉置樂鄉縣也 章山漢書地理志江夏郡  
竟陵縣章山在東北古文以爲內方山尚書禹貢  
導嶓冢至于荆山內方至于大別孔安國注云內  
方在荊州漢水之所經也 澧水在郡北角田邨  
去城一百里伍端休江陵記云帶澧水謂此水也  
荊南志荆潭以上爲澧水荆潭以下爲漕水 層  
臺荊南志云楚地以北山東有層臺昔楚莊王築  
之延袤百里砥石千里時有諸卿士諫王王從而  
毀也 石橋荊州記云南石橋津泉水從紫蓋山  
下東流爲溪故累石爲橋以渡行者因以是爲稱

雲夢澤周禮荊州之藪是爲雲夢鄭玄注在華  
容縣爾雅十藪楚有雲夢郭璞注巴邱湖是也春  
秋文耀鉤大別云巴東雷澤九江衡山皆雲夢是  
也宋永初山川古今記雲夢澤一名巴邱湖荊州  
之藪故魏武帝與吳主書云赤壁之困過雲夢澤  
中有大霧遂使失道是此 章華臺左氏傳云楚  
子成章華之臺願與諸侯落之春秋外傳楚靈王  
登章華之臺願謂伍舉曰美夫舉對曰先君莊公  
爲臺高不過望國氛大不過宴俎豆人不廢時官  
不廢朝是以能除亂克敵今君爲此臺也國人疲



馬財用盡焉百官煩焉而以為美楚其殆矣

當陽縣

西一百五十里  
舊十鄉今六鄉

漢舊縣屬南陽郡即廣陽王

子益之所封地又為臨沮侯國今縣北有故城焉  
又按庾仲雍荊州記云本楚之邑也春秋左氏傳  
楚潘崇伐麇至于錫穴潁容釋例云麇當陽也

綠林山王莽末王匡王鳳起兵于綠林山中

南北紫蓋山在縣南八十里南者與覆船山相  
接二山頂上方而四垂若繖蓋之狀常有石皆紺  
色故以紫為稱上有丹井 當陽坂即曹操追先  
主之所 綵水出紫蓋山下綵碧甘馨異于常派

金牛荊州記云紫蓋山有名金每雲晦日輒見

牛出食光照一山即金之精爾

漳口荊州圖副

謂之漳口左傳宣公四年楚若敖攻王師于漳澐

謂此水也

沮水經當陽北十里餘東南流一百

里入沱江即左傳楚昭王取其妹季芊畀我以出

涉睢是也又按漳沮二水並出建安界而合流于

此故左傳所謂江漢沮漳楚之望也

麥城荊州

圖副云故老相傳云是楚昭王所築王仲宣嘗登

其東隅故其賦云挾清漳之通浦倚曲沮之長洲

關公為呂蒙所算還至當陽保此城詐降而遁朱



然潘璋斬于臨沮之章鄉也 磨城盛弘之荊州  
記云麥城東有驢城沮水之西有磨城犄角麥城  
昔伍子胥造此二城以攻麥城假驢磨立名俗諺  
云東驢西磨麥自破

校勘

荊州 總序

晉書云荊州領郡十九理襄陽洎平吳復理  
南郡即今所也

按晉書地理志荊州名南北雙立吳荊州  
領十五郡魏荊州領七郡未見今記所引

之文惟通典云晉平吳置南郡及荊州領  
郡十九理于此今記豈引通典而誤為晉  
書耶通典荊州領郡十九理南郡反在平  
吳之後而今記領郡十九理襄陽乃在平  
吳之前此尤舛誤又皆與晉志不合當攷

枝江縣 總序

史記謂楚文王自丹陽徙都此亦曰丹陽即  
今巴東郡是也

按史記楚熊繹始封于楚居丹陽徐廣云  
在南郡枝江縣又云楚文王熊貲立始都



郢今記謂丹陽在今巴東楚文王自丹陽徙都枝江似與史記及徐廣注不合然楚始封今巴東曰丹陽後徙枝江亦曰丹陽則徐廣謂枝江爲丹陽者是也楚屢徙都所至皆曰郢州今記謂文王自丹陽徙都郢爲枝江者枝江初亦嘗爲郢乎但未見本何書當攷

太平寰宇記卷之一百四十六終

太平寰宇記卷之一百四十七

山南東道六

峽州

雲安軍

峽州

峽州

夷陵郡今理夷陵縣

春秋及戰國時並爲楚地故曰荆門

虎牙卽楚之西塞秦將白起攻楚燒夷陵卽其地

秦以此地屬南郡二漢因之魏操平荊州于此置臨江郡吳錄云蜀昭烈皇帝立宜都郡于西陵卽夷陵也在吳蜀之界吳得之頗爲重鎮故大將軍陸遜上疏曰夷陵要害國之關限若失之非徒損



一郡之地荆州亦可憂也歷晉宋齊並爲宜都郡  
理又宜都記云郡城卽陸抗攻步闡拒晉于此壘  
梁武帝天監中于此置宜州以舊宜都爲州之名  
後魏改宜州爲拓州蓋取開拓之義周武帝以州  
扼三峽之口復改爲峽州陳嘗得之以爲重鎮隋  
伐陳陳人守荆門狼尾灘並在宜都界也又荆渚  
記云夷陵郡居大江之上西通全蜀故夷陵有安  
蜀古城存焉隋爲夷陵郡唐武德二年平蕭銑置  
峽州領夷陵夷道遠安三縣貞觀八年廢東松州  
以宜都長陽巴山三縣來屬其年省夷道入宜都  
陵郡乾元元年復爲峽州

元領縣五

今四

夷陵

宜都

長陽

遠安

一縣舊廢

巴山

州境

東西二百二十里

南北二百九十五里

四至八到

東北至東京一千六百里



西北至西京一千八百二十里

東取江陵府大路至長安一千八百八十五里

東至江陵府三百四十里南取水路三百三十里

西至歸州二百里

北至襄州五百七十里

東南至江陵府界一百四十里

西南至施州七百六十里

西北至歸州界二百三十里

東北至江陵府界九十里

戶

唐開元戶八千九十八

皇朝戶主二千九百八十三客一千四百一十八

風俗

楚之俗剽悍巧猾管子曰水弱而清其民輕果而好詐是也士女事麻楮不事蠶桑男子力耕火種不知文學其信巫鬼重淫祀與蜀同風

人物無

土產

葛貢 蠟 硝 茶

夷陵縣元七 本漢舊縣屬南郡尉吳謂之西陵即此

宋本自詐字起



按郡國志云郡置在石鼻山上縣卽白起所焚之地 夷山故城卽漢舊縣城在今縣西北 溫泉在縣之西 西陵峽在縣西北二十五里吳志云陸遜破劉玄德還屯夷陵守峽口以備蜀卽此是也 白馬穴宜都記云自西陵北崖有石穴遠望常有白馬出入其閒尋之莫覩 虎牙山在縣東南三十里袁山松宜都山川記虎牙山有石壁其色黃閒有白文亦有牙齒形 爾雅臺郭璞注爾雅于此臺故郡有郭雅臺焉 方山有神祠壇或人誤有穢污四面風動竹以拂之如掃 高筭山

在縣西七十七里袁山松句將山記云登句將北見高筭山巖然半天荆州圖副云昔堯時大水此山不沒如筭也 黃牛山盛弘之荆州記云南岸重嶺壘起最大高岸閒有石色如人負刀牽牛人黑牛黃成就分明此岩旣高加以江湍紆迴雖途經信宿猶望見之行者歌曰朝發黃牛暮宿黃牛三朝三暮黃牛如故 望相山俗呼爲鍾武山是也 七谷村郡國志云西陵縣有七谷村有石馬穴一曰馬穿昔日常有白馬出穴人逐之入穴潛行出漢中漢中人失馬亦出此穴相去數千里相



通 石鈞鉞有一石水沸其中號曰千石鈞鉞

宜都縣 東六十里 元九鄉 本漢夷道縣屬南郡故城在今縣

西後周天和三年江南為陳所併陳文帝天嘉元

年于漢夷道縣城置宜都縣唐武德四年置江州

貞觀八年州廢來屬 荆門山在縣西北五十里

袁山松宜都山川記云南崖有山名荆門北崖有

山名虎牙 羊腸山在縣南七十里高一千三百

丈其山盤屈如羊腸之狀盛弘之荆州記云登羊

腸望見南平沮漳自巴陵左右數百里皆見此山

故夷道縣城在縣東五十里唐貞觀八年廢入

### 宜都縣

長陽縣 西北十九里 元七鄉 本漢佷 音恆 山縣屬武陵郡孟康曰

出藥草恆山是也隋開皇八年李伯禽據縣背陳

入隋即改佷山縣為長陽縣南崖有長陽溪因以

為名 長陽溪荆州圖副云長陽溪側有異花韶

艷奇絕欲摘先乞不得輒取取即隨手零落 魚

城在今縣西北五十里四面險絕有林木池水為

守禦之要 故睦州城在縣東三百步隋開皇九

年置十七年廢唐武德四年復置八年又廢 故

佷山縣城隋開皇九年廢今基在縣西六十五里



武落山中一名難留山在縣西北七十八里本廩君所出處也世本云廩君之先故出巫蠶落鍾山石穴中有二所其一色赤其一色黑如丹漆狀廩君出于赤穴餘姓亦出黑穴廩君曰務相姓巴氏與樊氏暉氏相氏鄭氏五姓俱出未有君長皆爭神廩君五姓皆往登呼躡穴屋以劍刺之劍不能著獨廩君劍著而懸于穴屋因立爲君盛弘之荆州記云難留山北有石室可容數百人常以此室僻嶮不可攻因名爲難留城西北有石穴把火行百餘步有二大石相去可丈餘名爲陰陽石陰

石常濕陽石常煬旱則鞭陰石應時而雨雨則鞭陽石俄時而晴但鞭者不壽復不得稱名人頗憚之清江一名夷水東自施州開夷縣界流入昔巴蠻有五姓未有君長俱事鬼神又各令乘土船約浮當以爲君唯務相獨浮因共立之是爲廩君乃乘土舟從夷水下至陽鹽鹽水有神女謂廩君曰此地廣大魚鹽所出願留共居不許鹽神暮輒來宿且化爲蟲羣飛蔽日天地晦冥積十餘日廩君因伺便射殺之天乃開明廩君乘土船下及夷城夷城山石險曲其水亦曲廩君望之而嘆山崖



為崩廩君登之上有平石方二丈五尺因立城其  
傍而居之四姓臣之後死精魄亦化為白虎也

廢巴山縣在縣南七十里本佷山縣地即古捍關  
楚蕭王拒蜀之處隋開皇五年分佷山置巴山縣  
今縣北有山曲折似巴字因以為名今廢

遠安縣

州北一百六十  
里元管四鄉

本漢臨沮縣地晉安帝立高

安縣屬汶陽郡後周明帝武成元年改高安為遠  
安縣 孤山郡國志云遠安有陸抗故城故城之  
南有孤山袁山松為郡嘗登此山四望俯見大江  
如縈帶舟船如鳧鴈焉 佷山山谷之中有石穴

穴出清泉水中有神魚大者二尺小者一尺釣者  
先陳所須多少拜而請之數滿便止水側有異花  
欲摘如魚請之又有異木名千歲葉似棗冬夏青  
青復有蒼茫溪相近 宜陽山有風井穴大如甕  
夏出冬入有樵人置笠穴口風噏之後于長陽溪  
口得笠則知潛通也 丹山郡國志云有石鵝在  
仙室山西復連丹山袁山松宜都記云丹山時有  
赤氣籠井如丹故加此名 五龍山郡國志云山  
有五峯若龍狀因以名之 濫水即清溪源也在  
邑界 百井山在縣西南四十五里高三千五百



丈有清泉數十汲之可飲因名百井或天氣晴朗  
卽山頂望江陵府二百餘里歷歷如在目前亦髣  
髴見長沙之地 清溪在縣南六十五里源出清  
溪山下冬無夏增鬼谷先生傳云楚有清溪下深  
千仞其水靈異

雲安軍

雲安軍皇朝乾德二年以夔州雲安縣上水去州二  
百里人戶輸納不便于本縣建一軍從本州之所  
奏請也仍領雲安縣

軍境

東西八十五里

南北二百四十九里

四至八到

初置軍未有至東西京里數

東至夔州奉節縣一百三十里

西至萬州南浦縣一百四十三里

南至施州清江縣三百七十里

北至夔州奉節縣二百四十三里

北至夔州大昌縣四百二十六里

東北至萬州二百一十六里

西北至萬州南浦縣二百一十四里



戶

舊戶載夔州籍

皇朝戶主四千三百一十客三千四百九十

風俗同夔州

土產同夔州

雲安縣舊十四鄉今十三鄉本漢胸臆縣地屬巴郡有橘官鹽

官十三州志胸臆地下濕多胸臆蟲故以為名音胸

胸臆城漢縣在萬戶城西三十一里音閏蜀

江在縣南三百步

太平寰宇記卷之一百四十七終

太平寰宇記卷之一百四十八

山南東道七

夔州

大寧監

歸州

夔州

夔州雲安郡今理奉節縣春秋時為夔子國其後為楚滅故其

地歸楚後秦滅楚置三十六郡此即為巴郡地西

漢十三州皆益州部漢書地理志云江關都尉理

魚復有橘官即今郡也三國時蜀先主為吳將陸

遜敗于夷陵退屯白帝城因改為永安即此地又

按郡國志白帝城即公孫述至魚復有白龍出井



中因號魚復為白帝城劉先主改魚復為永安仍于州西七里別置永安宮城在平地其後吳將全琮來襲不克又羅獻為領軍守永安聞魏軍平蜀三日哭于都亭是也晉太康中復永安為魚復有故江關在江南岸北對州城即先主于此置故陵郡後主改為巴東郡宋泰始三年以三峽險隘多山蠻據峙以為寇賊立三巴校尉以鎮之宋末廢三巴校尉齊建元二年以荊州之巴東建平二郡益州之巴郡梁州之涪陵四郡立巴州永明元年省巴州梁大同三年于郡理立信州後魏廢帝三

年移巴東郡于梁置陽口縣理其縣蓋今州西陽水口今無餘址周明帝二年又于州理置永安郡以魚復巫山縣屬焉巴東郡惟領雲安一縣武帝天和元年自白帝城移理于永安宮南五十步宣政元年州復還白帝城仍置總管府隋開皇二年罷郡郡所領縣竝屬信州大業元年廢總管府三年罷州為巴東郡唐武德元年改為信州領魚復巫山雲安南浦梁山大昌武寧七縣二年以武寧南浦梁山屬浦州又改信州為夔州仍置總管管夔峽施業浦涪渝谷南智務黔充思巫平十九州



八年以浦州之南浦梁山來屬九年又以南浦梁山屬浦州貞觀十四年為都督府督歸夔忠萬涪渝南七州後罷都督府天寶元年改為雲安郡至德元年于雲安置七州防禦使乾元元年復為夔州二年刺史唐論請升為都督府尋罷之按郡城臨江而險蓋據三峽之上

元領縣四

今三

奉節 巫山 大昌

一縣割出

雲安

置軍

州境 缺

東西

缺

南北

缺

四至八到

東取江陵府至長安二千四百一十五里

東至歸州三百三十里

南至施州山路五百里

西至萬州水路三百里

北至金州九百五十一里

東南至歸州四百四十二里

西南至施州六百六十二里



東北至達州五百二十六里  
西北至開州四百五十六里

戶

唐開元戶一萬五千九百

皇朝戶主三千八百五十七客三千二百三十

風俗 同峽州

人物 無

土產

蠟 今貢 紵布 巴戟 黃蘗 橘 瓜疇芋區 似區

薯蕷疇似貫瓜 皆伏根草也 吐綬鳥 大如翟而五色可愛天和淑景即吐綬長一尺

須臾還 吞之 巫山多鵬鳥

奉節縣 去州四里舊十鄉今十一鄉 本漢魚復縣也今縣北三十

里有赤甲城是舊魚復縣基漢書地理志魚復縣

江關都尉所居有橘官屬巴都是蜀先主改為奉

節縣 白帝城盛弘之荊州記云巴東郡峽上北

岸有一山孤峙甚峭巴東郡據以為城水經注云

白帝山北緣馬嶺接赤甲山其間平處南北相去

八十五丈東西七十丈東傍瀼溪即以為隍西南

臨大江瞰之眩目唯馬嶺小差透迤猶斬山為路

羊腸數轉然後得上故記云寒山九坂最為嶮峻



按後漢初公孫述據蜀自以承漢土運故號曰白帝城 南鄉峽在縣西四十七里盛弘之荊州記云南鄉峽西八十里有巴鄉村蓋善釀酒故俗稱巴鄉酒也村傍有溪溪中多靈壽木 三峽山謂西峽巫峽歸峽俗云巴東三峽巫峽長清猿三聲淚沾裳卽禹疏以導江也絕峻萬仞瞥見陽光不分雲雨 八陣圖在縣西南七里荊州圖副云永安宮南一里渚下平磧上周迴四百十八丈中有諸葛武侯八陣圖聚細石爲之各高五尺廣十圍歷然碁布縱橫相當中閒相去九尺正中開南北

巷悉廣五尺凡六十四聚或爲人所散亂及爲夏水所沒冬水退復依然如故八陣圖下東西三里有一磧東西一百步南北廣四十步磧上有鹽泉井五口以木爲桶昔常取鹽卽時沙壅冬出夏沒盛弘之荊州記云壘西聚石爲八行行八聚聚閒相去二丈許謂之八陣圖因曰八陣旣成自今行師更不復敗八陣及壘皆圖兵勢行藏之權自後深識者所不能了桓温伐蜀經之以爲常山蛇勢此蓋意言之 黃龍灘荊州記曰三峽之首北岸有白鹽峯下有黃龍灘水最急沿泝所忌 赤甲



城公孫述築不生樹木土石悉赤如人袒臂故曰赤甲與舊白帝城相連皆在縣北卽楚地江關之要焉鄧芝從先主入蜀爲江關都尉城卽芝鎮于此也 永安宮漢末公孫述所築蜀先主崩于此城中故曰永安宮 古魚復縣在縣西一十五里蜀先主改爲永安縣今無城壁 灩澦堆周迴二十丈在州西南二百步蜀江中心瞿塘峽口冬水淺屹然露百餘尺夏水漲沒數十丈其狀如馬舟人不敢進又曰猶與言舟子取途不決水脈故曰猶與諺曰灩澦大如樸瞿塘不可觸灩澦大如馬

瞿塘不可下灩澦大如鼉瞿塘行舟絕灩澦大如龜瞿塘不可窺 三鉤鎮在州東三里鐵鎖斷江山橫江逗張兩岸造舟爲梁拖戰床于上以禦寇爲鎮居數溪之會故曰三鉤唐武德二年廢 瞿塘峽在州東一里古西陵峽也連崖千丈奔流電激舟人爲之恐懼 龍洞溪在州西一百里輿地志云永安宮西有南鄉峽峽西八十里有溪溪中有靈壽木此卽是龍洞溪善釀酒之邨也 白鹽山在州城澗東山半有龍池天旱燒石投池鳴鼓其上卽雨左思蜀都賦云潛龍蟠于沮澤應鳴鼓



而興雨卽此也 柏柱巴郡有柏柱大可十圍高  
二十丈餘乃公孫述時樓柱所斫之處忽生枝而  
不朽

巫山縣

東南七十二里  
舊六鄉今八鄉

本楚巫郡地史記云秦昭王

三十年伐楚取黔中巫郡漢改爲巫縣屬南郡故  
城在今縣北晉移于此立建平郡梁武帝廢郡隋  
加山字縣本夔子熊摯所治縣今多姓熊者 巫  
山盛弘之荊州記云沿峽二十里有新崩灘至巫  
峽因山名也首尾一百六十里舊云自三峽取蜀  
數千里恆是一山此蓋好大之言也唯三峽七百

里兩岸連山路無缺處重崖疊嶂隱天蔽日自非  
亭午夜分不見日月所謂高山尋雲怒湍流水絕  
非人境 神女廟在峽之岸 高都山江源記云

楚辭所謂巫山之陽高邱之阻高邱蓋高都也

大江水經曰江水又東逕巫峽注云夏水襄陵沿  
泝阻絕王命急宣有時朝發白帝暮到江陵其間  
千二百里雖乘犇御風不加疾也復有嘉魚春出  
景穴 楚宮在縣西北二百步在陽臺古城內卽  
襄王所遊之地 陽雲臺高一百二十丈南枕長  
江楚宋玉賦云遊陽雲之臺望高唐之觀卽此也



太平寰宇記卷之一百四十八  
鳥飛山在縣西南六十里言山高鳥飛不能越也

大昌縣

東北六十四里依舊四鄉

本漢巫秭歸二縣地輿地志云

晉太康元年分秭歸巫縣置建平縣後改爲大昌縣屬建平郡 千頃池在縣西三百六十里波瀾浩渺莫知涯際分爲三道一道東流當縣西爲井源一道西流爲雲安縣陽溪一道南流爲奉節縣西瀼水

大寧監

大寧監本夔州大昌縣前鎮煎鹽之所也在縣西六

十九里溪南山嶺峭壁之中有鹽泉湧出土人以竹引泉置鑊煮鹽皇朝開寶六年置監以收課利

歸州

歸州

巴東郡今理秭歸縣

土地所屬與雲安郡同周夔子之國

戰國時其地屬楚秦爲南郡之地漢于此置秭歸縣袁山松云屈原此縣人也旣被流放忽然暫歸其姊亦來因名其地爲秭歸秭與姊同按三國志云吳置建平郡宜都之西部也甚爲重鎮其地險固孫皓末晉將王濬自蜀沿流伐吳守將吳彥表皓曰請增建平兵若建平不可晉師終不過皓不



宋本自元領起

從旋見亾國東晉宋齊皆因之隋屬巴東郡之秭歸縣唐武德二年割夔州之秭歸巴東二縣置歸州三年分秭歸置興山縣治白帝城天寶元年改為巴東郡乾元元年復為歸州

元領縣三

秭歸 巴東 興山

州境

東西一百八十一里 南北二百四十八里

四至八到

東北至東京一千九百里

東北至西京一千八百四十五里

東取江陵府路至長安二千九百一里

東至峽州二百里

南至施州山路五百五十里

西至夔州三百三十二里

北至房州山路五百里

東南至峽州界一百三十二里

西南至夔州同前

西北至夔州界一百三十六里

東北至峽州界二百一十七里







塞山蠻之路絕寇掠之徑 屈大夫宅有女須廟  
在宅東女須卽大夫姊也有擣衣石猶存 麝香  
山在縣東南一百一十里山多麝 紫極宮黃魔  
神廟其記云咸通壬辰歲令翰林蘭陵公自右史  
竄黔南秋八月二十七日夕泝三峽次秭歸時蜀  
水方漲橫濤蔽日公積悸而寢夢神人赤髮碧眸  
且云險不足懼公異之再寐又夢公詰其所自則  
曰我黃魔神居紫極宮之西北隅將祐助明公出  
于此境公曰吾斥去荒徼危殆未已神能惠我何  
止朝夕所幸與我俱遊我不忘矣亟言之神許諾

自是抵于黔又遷于羅每陟險難神恍然如在洎  
公遷于朝夢神告歸公因爲設廟列塑于宮之傍  
丁酉歲公從弟侁自灃陽尹亞西蜀路出祠下以  
囊金致公意謂前制不專請別修做太守清河崔  
公承命感異躬親營之心匠旣陳層軒以新神樂  
來斯靈儀蹲蹲按靈寶經五方有大魔其中央曰  
黃天魔王橫天擔力謂能扶是蒼旻同覆萬有天  
其或者以公有弘濟之業將扶危定傾作鎮天步  
俾黃魔降監爲公之朕兆乎噫天之功必藉于大  
賢神之靈故輔于有德必鴻猷盛績萃于公之心



未可知也循以學官謫秭歸奉太守命弗敢讓所  
記乾符丁酉歲仲春月九日司戶參軍袁循記蘭  
陵公卽唐朝蕭邁尋爲宰相此異事也故編于寰  
宇記

巴東縣

西六十里舊二鄉今七鄉

本漢巫縣地三國時屬吳後周

天和三年于巴陵故城置樂鄉縣隋開皇十八年  
改樂鄉爲巴東縣在巴之東因以爲名 石門山  
在縣東北三十五里山有石逕深若重門劉先主  
爲陸遜所破退經此門追之旣急先主乃燒鎧斷  
道然後得免也

興山縣

北八十五里舊五鄉今七鄉

本漢秭歸縣地三國時其地

屬吳至景帝永安三年分秭歸縣之北界立爲興  
山縣屬建平郡隋廢之唐武德初又置 香溪在  
邑界卽王昭君所遊處 王昭君宅漢王嬙卽此  
邑之人故云昭君之縣邨連巫峽是此地 玉虛  
洞在縣南五十里唐天寶五載其洞忽開可容千

人

校勘 寰宇記第一百四十八

夔州

總序

仍置總管管夔峽施業浦涪渝谷南智務黔



太平寰宇記卷之一百四十八  
充思巫平十九州

按今記所引皆舊唐書地理志之文凡十六州其三州闕今夔州圖經以歸萬忠三州足之然萬州本浦州忠州本臨州貞觀八年方改今名圖經既不應析萬浦爲二又武德二年不應已有萬忠之名今當闕疑

大寧監

按今圖經開寶六年置監端拱元年以大昌縣來屬詳此則置監時縣猶屬夔州而今記作于大昌未來屬之前也

歸州

總序

武德三年分秭歸置興山縣治白帝城

按興山縣在巫山下流去白帝城尙遠而云治白帝城蓋仍舊唐志之誤耳

太平寰宇記卷之一百四十八終



宋本起

太平寰宇記卷之一百四十九

山南東道八

萬州

忠州

梁山軍

萬州

萬州南浦郡今其地即春秋時楚之西鄙為夔子國

亦熊摯受封之所秦漢皆為巴郡胸胸音認認音縣地蠢

音如尹切東漢末以胸認屬巴東郡魏晉亦同宋齊因

之後魏分胸認縣地置安鄉郡及魚泉縣後又改

安鄉郡為萬川郡魚泉縣為萬川縣兼立南州于

此隋開皇初郡廢而州存十八年改萬川縣為南



太平寰宇記 卷之一百四十九  
浦縣大業三年州又廢併其地復入巴東郡唐武德三年以其地曠源深須資郡府仍割信州之南浦梁山武寧三縣于此置南浦州領南浦梁山武寧三縣八年廢南浦州以南浦梁山屬夔州武寧屬臨州其年復立浦州依舊領三縣貞觀八年改爲萬州天寶元年改爲南浦郡乾元元年復爲萬州

元領縣三

今二

南浦 武寧

一縣割出

梁山

置軍

州境

東西二百二十八里 南北四百五十里

四至八到

東至東京三千二百九十里

東取江陵府路至西京二千四百五十五里

東取江陵府路至長安二千七百一十里若取開

通洋三郡路至長安一千六百里

東至夔州水路三百里

西至渠州四百五十里



南至施州六百八十三里

北至開州二百三十二里又有小路一百六十里

東南至施州清江縣三百四十里

西南至忠州界九十六里

西北至通州四百里

東北至瀘溪開州兩郡界一百七十里

戶

唐開元戶五千一百

皇朝戶主六百一十九客一千二百八十五

風俗

正月七日鄉市士女渡江南娥眉磧上作雞子卜

擊小鼓唱竹枝歌二月三日攜酒饌鼓樂于郊外

飲宴至暮而同謂之迎富

人物無

土產

金貢 白膠香 蠲紙 苦藥子 始因大曆十一年在京兆尹黎幹撰方

進止云此藥性寒去熱能解一切毒每服之立有應效遂為常貢

南浦縣 舊八鄉今一十五鄉 本漢胸臆縣地後魏廢帝元年分

胸臆之地置魚泉縣以地土多泉民賴魚罟為名

後周改為萬川縣隋開皇十八年改萬川為南浦



以浦爲名 高粱大山在縣北四十里尋江源記  
云高粱山尾東跨江西首劍閣東西數千里山嶺  
長峻其峯崔嵬于蜀市望之若長雲垂天一日行  
之乃極其頂俯視眾山泯若平原劍閣銘所謂巖  
巖梁山積石峩峩卽述此山也 千金島在縣南  
三里揭立江心石高數丈廣百步 娥眉磧在州  
對江岸磧形如眉多細石爛斑可以遊戲 使君  
灘在州東二里大江中昔姚亮赴任益州行船至  
此覆故名之 新婦灘東南岸十里崖石上有婦  
人容狀故名 岷江在縣東三十步自成都而來

### 下入雲安縣界

武寧縣

西南一百三十里依舊四鄉

本漢巴郡卽臨江縣地後周

武帝初分臨江縣地置源陽縣屬南都郡至建德  
四年改南都郡爲懷德郡又改源陽縣爲武寧縣  
取威武以寧斯地爲名隋開皇三年廢臨州以縣  
屬巴東郡唐武德二年改屬浦州卽今萬州是也  
木樨山在縣東南十三里山頂有池冬夏可驗  
其淺深隨大江水漲增減 大江在縣南十三步

金磧山在縣西南十五里 石笋山在縣東北  
三十五里其狀如笋 雙渠在縣東十里灘心有



石泉分爲二狀如雙渠

忠州

忠州

南賓郡今理臨江縣

按其所屬自秦漢之代與夔州同又

譙周巴記云後漢初平六年立臨江縣屬永寧郡

今郡東二里臨江南古城是也建安六年改永寧

郡爲巴東郡臨江縣屬焉歷晉宋皆因之至梁大

同六年于此立臨江郡以郡城臨于江也後魏廢

帝二年改爲臨州領臨江萬川二郡隋開皇三年

郡廢而州存大業五年州廢以其地入巴東郡義

寧二年又于臨江縣立臨州又分置豐都縣唐武

德二年分浦州之武寧置南賓縣又分臨江置清

水縣並屬臨州八年又以浦州之武寧來屬其年

又隸浦州九年以廢隣州之墊江來屬貞觀八年

改臨州爲忠州以地邊巴微意懷忠信爲名天寶

元年改爲南賓郡乾元元年復爲忠州

領縣五

臨江 豐都 墊江 南賓 桂溪

州境

東西一百六十里 南北三百八里

四至八到



東至東京三千一百二十五里

東取江陵府路至西京二千七百一十五里若取

開州路至西京一千九百里

東取江陵府路至長安二千九百七十五里

東至萬州水路二百六十里

南至黔州六百五十里

西至涪州三百五十里

北至渠州五百一十四里

東南至萬州界四百五十六里

西至涪州水路三百五十里南渡江山路至黔州

四百里

西取桂溪隣山二縣路至渠州五百里

戶

唐開元戶六千七百二十二

皇朝戶主一千九百七十客一萬六千七百二十

風俗

夷獠頗類黔中正月三日拜墓墳二月三日攜酒郊

外迎富除夜然燈照先祖墳墓

人物無

土產



苦藥子

大麻十一年京兆尹黎幹奏稱此藥性寒去熱能解一切毒每服之立有應效

巴戟 麥門冬 黃連 天門冬 綿 紬 文

刀

蘇薰席 按段氏遊蜀記云忠州墊江縣以蘇薰為席絲為經其色深碧

臨江縣元十本漢舊縣也屬巴郡梁立郡于此縣本

以臨江川為名 東溪水在郡東南三里源自南

賓縣南流于江 故石城在縣東百里當岷江之

北岸李雄之亂巴西郡寄理此城其城四面懸絕

焉 鳴玉溪在州西十里有懸岩瀑布高五十

餘丈潭洞幽邃古木蒼然前刺史房式嘉其幽絕

特置蘭若凡置五橋以渡溪水今廢

豐都縣

西九十二里元四鄉

本漢拱縣地屬巴郡續漢書郡國

志云永元二年分拱縣地置平都縣取界內平都

山為名蜀延熙中省入臨江隋義寧三年復置改

為豐都焉

拱一作枳

平都山在縣北二里神仙傳云

後漢延光元年陰長生于馬明生處求仙法乃將

長生入青城山中煮黃土為金以示之立壇啜血

取太青神丹經授之乃別出長生後于平都山白

日昇天即此張道陵所化二十四化居其一也

大江在縣南一百步

墊江縣

北一百七十里元五鄉

本漢臨江縣地屬巴郡後魏恭



帝三年分臨江地于此置墊江後周天和二年改墊江為魏安縣隋開皇十八年改魏安復為墊江

縣容溪水在縣南十里西流

南賓縣

西南一百里舊五鄉今三鄉

本漢臨江縣地自漢至梁為

臨江縣地不改後周初分臨江縣置源陽縣後改源陽為武寧縣屬南賓郡尋又改為懷德郡屬南州唐武德二年分浦州之武寧縣西界地置南賓縣屬臨州貞觀八年改臨州為忠州仍不改所屬望途溪在縣北二百步西流至豐都縣南注濁江

桂溪縣

西一百三十九里舊五鄉今三鄉

本漢臨江縣地按漢臨江

縣在今臨江縣界臨江故城是也唐武德二年分臨江地于此置清水縣屬臨州天寶元年以隴右有清水縣名同改為桂溪以縣界桂溪為名容溪水在縣南三里西流入墊江界

梁山軍

提行

梁山軍

理梁山縣

本萬州梁山縣皇朝開寶三年置屯田

務因建為梁山軍管梁山一縣

領縣一

梁山



軍境

東西一百八十五里 南北七十三里

四至八到

新建軍未有至東西京里數

東至萬州南浦縣界六十五里

南至忠州桂溪縣界四十三里

東北至開州新浦縣界六十四里

東南至忠州臨江縣界二十里

西南至忠州臨江縣界四十里

西北至達州三岡縣界一百五十里

戶

舊戶載萬州籍

皇朝戶主六百八十二客四千六百七十二

風俗 同忠州

人物 無

土產

苦藥子 事載在萬州卷內載

梁山縣 依舊四鄉 本漢胸臆縣地後魏廢帝分胸臆置魚

泉縣今縣即魚泉縣地周天和二年于此置梁山

縣蓋因界內高梁山為縣名皇朝開寶三年割立



宋本出柏以下缺

軍 柏枝山在縣東南十五里尋江源記云景穴  
有嘉魚其味甘美景穴出柏枝卽此山是也 逢  
溪山在縣南八十步西南流入忠州桂溪縣界  
石瓦山在縣西一百一十三里山嶺有古人礪刀  
劍亂石如積瓦焉 七城山在縣西二十里

太平寰宇記卷之一百四十九終



聖